27.01.2022 **№ 2** (1260)

www.khanty-yasanq.ru

Основана 11 февраля 1989 года

E-mail:gazeta@khanty-yasang.ru



Тал котиль этпос 25 хоталэ университетытт ос колледжитт ханищтахтын няврамыт ялпын хоталаныл олыс. Ты хурит Ягрим павыл колледж студентыт Егор Перехрест, Александр Артеев ос Александр Зеров послым олэгыт. Тан машинат щёпитан магыс китыт тал ханищтавет. Ман ты маньлат пыгыт ты хоталыл янытлыянув.

Ты номерт ловиньтэн:

Школа астлан няврамыт магсыл ляххал

Сав няврам янмалтам эква

▶ 8-9

Юнсхатнэ маньши нэкве

10

Катыл варим пормасыт суссылтавёсыт

12-13

Маньщи латын элаль тотнэ хотпат

14

Щань латын эрыг хольт суйты

16



Махум нётмилолныл ойтавет

ан округувт йильпи тал овылтахтам элы-палт онтолов сотыра махум сощзащита палыл олныл ойтвесыт, ань Пенсионный фонд палыл ты нётмилыл тах варавет.

Ты олныт рётын юсвой этпост ойтыглавет кос, ос ань тал котиль этпос ват нупыл атыт щисла мус сартыннув мивет.

Хотьют тал котиль ос ретын юсвой этпосыгт Пенсионный фондын манос Госуслуга интернет лопс хосыт овыл щёс нётмил вовнэ магыс латын хансы ке, тан олныл ретын

юсвой этпосныл ойтуңкве патавет.

Ань ты хотал мус хурумсат элумхолас нётмил магыс тув латын хассыт. Яныгполь этпосныл пособие ос компенсация олныт ос пёс олум щирыл аквтахольт ойтавет тах.

Ань Пенсионный фондыт савынпалэ няврамын щёмьят нётмилыл мивет.



Тувыл рупаттал олнэ тал яныт няврамыт янмалтан ос няврамын нэт-хумыт, тан пособие-олныл ойтавет.

Рўпаттал олнэ омат манос атят, тан танки нявраманыл манос мот няврам янмалтанкве висыт ке, тан ос акв щёс олныл ойтавет. Полицият манос армият лусытам това хотпат атимыг ке емтсыт, тан колтагланыл ос нётмилыл варавет.

Ты щёмьят нявраманыл пусмалтахтын колн кётыглавет, олнэ коланыл хот-щёпитавет манос коланылт най постын, кол рёг магыс, исум ос полям вит холтнэ магыс ойтхатункве нётавет.

Округ мирколныл кётым ляххал маньщи латныг **Николай МЕРОВ** толмащластэ

Мир ўргалан хотпат рўпатаныл

ты этпос хурумхуйплов хоталэт Ханты-Мансийск уст ляххал тотнэ колн Росгвардия кущай хум Евгений Симаков ёхталас. Ювле хультум талт хумус олсув, тав ты урыл потыртас.

Евгений Симаков лавме щирыл, молты тал Росгвардиян 75 талэ товлыс. Росгвардият «ОМОН» ос «СОБР» нампа колыгт лусытан хотпат хурмахкем сотыра люль нак осн-паттысыт, нёлоловсат хотпат пувсаныл. Тан ты махумныл китсаткем писаль, ат сотыра савит патрон, хот сотыра кила куратан ут (взрывчатка) хот-висыт.

Евгений Евгеньевич лавыс, округувт сав вораян хотпа олы. Молты тал ты вораян хотпат уральтавесыт, тан писаляныл ровнэ мат вос оньщияныл. Писаль люльсан ощнэ хотпат штрафыл хасвесыт, писаляныл хот-вуйвесыт.

Ос ёмас вармальтыи, 2021 талт Уральский федеральный округянытыл ман мавт щар мощщанувтарвитвармаль ёмталас. Кущай лавыс:

– Йильпи талт ўщлахтын хоталыт олум порат, полицият рўпитан хотпат сав мир акван-атхатнэ мат ўргалым ощсаныл, акваг уральтахтым тот ёмыгтасыт. Тыимагыс павлытт, ўсытт сака яныг тарвит ат ёмталас.

Ювле хультум талт, тал котиль этпост Сургут ўст кон акв элумхолас матаре хотум ёмтыс, тав лёнхыт ёл-патыс. Росгвардият рўпитан хотпа тавён нётмил варыс, лылытэ нэгылттастэ, лёкка-

рыт молях вовсанэ, хотпа пульницан тотвес, ты хосыт лылытэ налыс

Рётын юсвой этпост Пыть-Ях ўст акв няврам вонхан патыс. Полиция хотпат таве тувыл нох-хартсаныл ос пўльницан тотсаныл. Матъёмас нэматыр тарвит вармаль ат ёмтыс.

Нефтеюганск ўст ос акв хум люль тэрпи тыналас, тав «СОБР» нампа полициян пуввес. Та хотпа мань писаль ёт оньщис, таитэ ос хот-вуйвес. Ань ты тэла магыс тав турманколн ўнттувес.

Юи-овыл щёс ват саграпнал этпост ос акв



Е.Е. Симаков

вармаль ёмталас, Росгвардият рўпитан хум ляпат олнэ щёмья коланыл нох-пёламлас, лусытан хум тананылн конквалункве нётыс ос эрнэ нэпаканыл кон-тотункве алымас.

Евгений Евгеньевич лавыс, тыи ос мот савсыр вармаль щирыл тан касын хотал махумн нётэгыт. Тан 2022 тал тал котиль этпос овылтахтам пасныл нёлсат тарвит вармаль осн-паттысыт. Това хотпат штрафыл пинвесыт, товат ос тарвит нак варум магыс сутытавесыт.

Николай МЕРОВ



Щань латнанув элаль вос тотыянув

В ат саграпнал этпос 27 хоталэт Санкт-Петербург ўст А.И. Герцен нампа университетт рўпитан учёный махум ёнта пасан ватат щань латын урыл потыртасыт.

Тынакт тэланыл ищ-хипын ут хосыт варыг-ласаныл. Та палыт ман минункве пуссын хунь вёрмынувыт, ос ты щирыл рупитанкве кустыр олнэтэ, потраныл сав хотпан хунтлувёсыт.

Ты университетт рўпитан махум кит тал сыс яныг рўпата варсыт, элынт олнэ школатын ялсыт — Лўимат, Сибирьт ос Дальний Востокт олнэ школат уральтасаныл. Ты тэла палт А.И. Герцен нампа РГПУ профессор нэ, психология наука доктор Лариса Александровна Цветкова пунктотыс.

Нэ тох лавыс:

– Ты тэлав ман 2020 талт варункве овылта-слув. Россия янытыл Луимат, Сибирьт ос Дальний Востокт олнэ няврамыт уральтыянув, хумус олэгыт, щань лат-

наныл ваганыл ман ати, пуссын аман пустагыл олэгыт, торын маснутощнут аман оньщегыт, та маныр, тара-паттэв. Тувыл хунь эрнэ сакконыт щёпитанкве патэв, ты тэлав тах эрмыглы, сав няврамытн нётункве вермёв.

Ты тэла урыл сав хотпа латын щёпиталсыт, пуссын ищхйпын ут

пуссын ищхйпын ут ос профессор Татьяна

Кульпаст ханищтахтын няврамыт

хосыт потыртасыт. Махум яныг ўст ос мань павлытт хўнтлункве вёрмысыт – Москва ос Санкт-Петербург ўсыгт, Нижегородский, Ленинградский, Сахалинская областьт, Якутия ос Карелия мат, Камчатский ос Красноярский крайт, Ямал ос Югра мат. Латын оньщам махум китыглахтасыт, пўмщалахтасыт.

Педагогический наука кандидат нэ Елена Николаевна Агапова ос профессор Татьяна

Станиславовна Назмутдинова щань латын ханищтан тэла тарапаттысыг.

Хоты мат няврамыт танти латнаныл ёмащакв ваганыл, хот ос щар ат ханищтыяныл латнаныл, туп рущ латныл потыртэгыт.

Л.А. Цветкова лавыс, хуньты рўпатаныл астлыяныл, потраныл пуссын акван-атыяныл, нэпакыг варияныл. Тонт тах ущ мўсхал щирыл тара-патыяныл, хоты мат олнэ сосса мирыт латнаныл олы, нявраманылн ваве ос ханищтаве.

Ты учёный махум ман округувн ос ёхталасыт, сосса махманув олнэ павлытн ялсыт, школатын щалтсасыт. Маныр тара-паттысыт, хоты мат няврамыт щань латнаныл ваганыл, ты урыл тан тах потыр щёпитэгыт.

Светлана РОМБАНДЕЕВА

Ханищтахтын āгитпыгыт янытлыянув

Тал котиль этпос 25 щисла Россият ханищтахтын студентыт ялпын хоталаныл, рущ щирыл «Татьянин день» лававе.



Ягримт ханищтахтын агит-пыгыт

Муйлын хоталт агитпыгыт ханищтахтын мананылт акван-атхатэгыт, ханищтап урыл савсыр пумащит ос ощхулит варыглэгыт.

Хальўс район Ягрим павылт «Политехнический колледж» олы. Тот сосса няврамыт ханищтахтэгыт. Тан халанылт акв маньщи пыг Александр Артеев автослесариг ханищтахты. Тав Саранпавыл школа лов класс астламе юипалт тув минас.

Ты пыг сав няврамын щёмьят яныгмас. Омагеатяге Георгий Лелятов ос Таисия Лелятова Саранавылт олэг, тот рупитэг. Нэг-хумыг колтаглэнт ат

пыг янмалтэг. Александр янгыг олы.

Ань Александр китыт тал Ягримт ханищтахты. Тан группанылт ват нупыл ат аги-пыг, савынпалэ няврамыт Ягримныл олэгыт. Това няврамыт Ханты-Мансийск ос Сергино ўсыгныл ханищтахтункве тув ёхтысыт. Саранпавылныл тав ётэ 3 пыг тот ханищтахты.

Ты ялпың хоталаныл кастыл, ань ханищтахтын сосса агит-пыгыт ман пуссын сымыныщ янытлыянув. Няврамаквет, ёмщакв элаль ханищтахтэн, пустагыл олэн!

Николай МЕРОВ



Мощща мāхум нэпаканыл Реестрын кётсаныл

олты талныл Россия янытыл олнэ сосса мирыт наманыл акв нэпакн хансавет, рущ латныл «реестр» лававе. Федеральный агентство-колт рупитан махум ты рупата варегыт.

Ман округувт 30 сотыра арыгкем сосса махум ань олэгыт, тан халанылт 2021 тал сыс туп 8 сотыра 257 маньщи, ханты ос ёрн хотпат, тыи 27% савит мир, Реестрын хасхатсыт. Тамле ляххал внутренний политика департаментыт рупитан махум манавн кетсыт.

Ты йильпи талныл миркол кущаит ос савсыр организациятт рупитан хотпат национальность хансым намнэпакыт пирмайтанкве воссыг ат патэгыт. Ты нэпакыт тан ищхипын ут хосыт танки тах сунсэгыт.

Сосса хотпа нётмил винэ магсыл манос хул

алыщлан, вораян магсыл эрнэ нэпаканэ щёпитанкве ке паты, ос тав рестрын ат ке хасхатас, тав лицензиял ос мот нётмилыл тах ат миве. Тыимагсыл маньщи, ханты ос ёрн махум пуссын тув хасхатункве ань лававет.

Федеральный агентство-колн эрнэ нэпакыт тув почта щирыл кетункве ос ровегыт. Ман мавт маньщи, ханты ос ёрн щемьят МФЦ-колыт тара ты вармаль варункве вермегыт. Тот рупитан хотпат тананылн заявление хансункве ос элаль кетункве нетэгыт.

«Югра лылыёп» нампа общественный организацият рўпитан хотпат молты тал сыс «Впиши себя в реестр» нампа акция варыгласыт ос сосса махум МФЦ-кол щирыл тув хасхатункве вовиньталсаныл.

Ты тал тан ты рупата элаль варункве патэгыт, тал котиль этпос оигпан элы-палт тан МФЦ-колт рупитан хотпат ёт мань павлын мир палт ялункве щёпитахтэгыт.

Людмила ТЕТКИНА

Школа āстлан няврамыт мāгсыл ляххал

Ретын юсвой этпос овыл хоталэ мус аквхуйплов классыт ханищтахтын агитн ос пыгытн ЕГЭ магсыл заявлениенэпак хансункве эри.

Ты пора мус тан хоты экзамен хансункве касащегыт, танки периегыт. ЕГЭ хоты порат варавет, ань ты урыл просвещение Министерство лопсыт ловиньтанкве рови.

Ōвыл экзамен 11 классын ялантан агит ос пыгыт янк натнэ этпос 26 щислат тах хансэгыт, юи-овыл экзамен ойттур этпос 2 хоталэт вараве.

Ман округувт олнэ сосса няврамыт магсыл «Региональный перечень профессий» нампа нэпак пирмайтавес. Тув ань 90 арыгкем савсыр профессият хансым

олэгыт. 9 ос 11 классыт ханищтахтын агитн, пыгытн ты нэпак ёмащакв ловиньтанкве эри, эрын тан элаль ханищтахтын профессияныл тот хансым олы.

Няврамыт элаль ханищтахтункве минэгыт ке, ос тананыл ханищтан магсыл щаняныл-ащаныл олн ойтункве ке патэгыт ос ты профессияныл ты нэпакт хансым ке олы, олнаныл ювле мивет.

Университетыт ханищтахтын маньлат хотпат акв тал сыс 100 сотыра солковил ювле мивет. Колледжин манос учили-



Хулюмсунт школат ханищтахтын няврамыт

щан ялантан агит-пыгыт акв тал сыс 50 сотыра солковил ювле ойтавет.

Заочно щирыл ханищтахтын сосса махум ойтнэ олнаныл ос тах ювле мивет. Нуса щёмьят яныгман няврамыт савсыр пособие-олныл ойтункве патавет.

Ты нётмилыт нас тох ос ат мивет, ты элы-палт заявление ос савсыр эрнэ нэпакыт атункве эри, тувыл ханищтап ос маньлат хотпат вармаляныл щирыл рупитан департа-

мент колн кётункве эри. Ты департаментыт сосса махум отдел ань олы, тув свонитанкве ос ты вармаль урыл пумщалахтункве рови.

Ань сосса няврамыт Санкт-Петербург ўст А.И. Герцен нампа университетт «целевой набор» щирыл ханищтахтункве ос вёрмёгыт. Ань та ўст ман округувныл 12 маньлат хотпат ханищтахтэгыт.

Людмила ТЕТКИНА



Хонтан маньщи нэ яныг

мāхум Советн пирмайтавес

Тал котиль этпост Ханты-Мансийск уст яныгмахум Совет олыс. Наталья Николаевна Чайникова, такви опарищ наме Вахрушева, яныгпала хотпат Советн (рущ щирыл «Совет старейшин») тув рупитанкве пирмайтавес.

Ты Совет кўщаиг ханты хум Александр Михайлович Константинов блы. Тот пуссын аквъёт ловманкем ханты ос маньщи яныгпала хотпат рўпитэгыт. Тан сосса мир тэлат мўсхал щирыл щёпитанкве нётэгыт.

Яныгпала хотпат акван-атхатыгламаныл порат пасан варыгласыт. Наталья Николаевна такви янмалтам пиланэтыл атын нянь варыглас ос ёт-тотыглас. Махум санквлыпил, морах арталасыт ос щай айсыт. Тананылн ты тэнутыт сака мустысыт.

Ань ты Советыт рўпитан хотпат савсыр общественный рўпата варёгыт. Тан сосса мир щань латнаныл ос олнэхўлнэ вармаляныл элаль тотункве нётэгыт. Хўл алыщлан ос вораян хотпат тэланыл мусхал щирыл щёпитэгыт.

Танки манылт олнэ сосса махманув матыр тарвит вармаль оньщегыт ке,тан осты Советын латын кетункве вермегыт. Тот рупитан яныглала хотпат хултнэ латын лавегыт ос рупатаныл ёмасыг варнэ магыс хумус вермегыт, нётмилыл варияныл. Тан рупаттал олнэ сосса хотпатн ос нётэгыт.

Тувыл тан пурлахтын мананув ургалан магыс ос сав рупата варегыт. Финно-угор мирытаквъёт юртыныщ вос олсыт, тан ты тэла щирыл ос сав рупитэгыт. Хоты элум-холас янытлан намыл минкве эри, ты Советыт тан периегыт ос элаль эрнэ нэпакыт хансэгыт.



Н.Н. Чайникова потырты

Ман мавт рупитан кущаит матыр сапранит, конференцият манос мот эрнэ рупата варнэныл порат ты хотпат тув вовиньталыяныл. Тан ханты ос маньщи вармалит ёмщакв ваганыл, тот тананыл хултыгланкве вермегыт.

Ты вармалит магыс тан хурум этпос сыс акв-кит щёс акван-атхатыглэгыт. Тамле эрнэ рупата яныгпала хотпанув сосса мирув магыс ты варегыт.

Ань олум сапранин ты сосса хотпат ёхталасыт: Александр Михайлович Константинов, Дмитрий Васильевич Лельхов, Мария Кузьминична Волдина, Евдокия Андре-

евна Нёмысова, Диана Васильевна Герасимова, Фаина Павловна Иштимирова, Светлана Силивёрстовна Динисламова, Раиса Германовна Решетникова ос ань тув пирмайтым нэ Наталья Николаевна Чайникова.

Йильпи талув овылтахтам пасныл ханты ос маньщи газетагув кущаиг Светлана Силивёрстовна Динисламова паттувес. Сапрани олум порат Ассамблея кущай хум Еремей Айпин ёхталас. Тав Светлана Динисламова янытластэ ос такви хансум нэпакыл муйлуптастэ. Ань мот щёс ос туяг матыр тэлат варнэ магыс акван-атхатыглэгыт тах.



Пил тарсыт ўнттавет

Наталья Чайникова – хонтан маньщи нэ, тав Ханты-Мансийск ўс ляпат «Юрты Чайниковых» нампа такви нупыл хансум ма оньщи, тот палят янмалты ос мот савсыр рупата вари. Тав касын тал махманэ ёт мань ховтыт, ўльпат ос мот ййвыт элаль янмалтан магыс ўнтталы.

Тав Кострома ўсн ялыс, тот учёный хотпат ёт хонтхатыгламе порат пилыт янмалтанкве ханищтавес. Тувыл 2013 талт санквлыпил тарсыт тыг тотсанэ ос ўнттысанэ. Ань касын тал тот сав санквлыпил яныгми.

Нэ олнэ матэт мот савсыр пилыт ос янмалты. Касын тув ўст олнэ махум тав палтэ пил ватункве ёхталэгыт. Ань тот санквлыпил, тахт пил, морах ос мот савсыр пил ватункве рови.

Николай МЕРОВ



Египет мāт лўимā мир урыл вāнкве патсыт

Таньщи ос ханты махум культурав, олупсав ань Египет мат Каир ос Александрия ўсыгт ванкве патаве.

Ман округувныл тынакт сав махум тув ялсыт, тан луима мир культура тот суссылтасыт. Тан халанылт «Торум Маа» музей ос округ творчество колт рупитан махум тув ос вовыглавесыт.

Вячеслав Юрьевич Кондин, музейт заведующииг рупитан хум, ты урыл тох потыртас:

- Овлэт **«Тобольский Север»** нампа послым хурит выставка суссылтанкве патвес, таве Мавит ос Элумхолас музейт кущаиг рупитан хум Г.Б. Чечевин тув тотыстэ, тот сав хурит мирн сунсыглавесыт. Ты пес порат учёныит луиман ёхталаманыл порат сосса махум хурин послысаныл, ань тан хосытанылт пес йис олупса ванкве рови.

Ханты мир художник Геннадий Степанович Райшев послум хуриянэ тув ос тотыглавесыт. Ты хосыт ман нётнэ матевтыл ос ханты, маньщи мир хорамын маснутыл пумщалахтэгыт.

Округ творчество колныл Алексей Александрович Рещиков ялыс, тав 1988 талт «Торум Маа» музейт Уй ййквим порат варим хурит суссылтанкве тув тотыс. Ты коныпал тав выставкан ёхталан махум санквылтапыл санквылтапыл санквылтанкве ханищтасанэ ос нынюхыл (ты ханты махум нэрнэй иваныл тох лавияныл) ёнгункве ханищтасанэ.

Няврамытын саңквылтаңкве манос ёнгуңкве сака пумыщ олыс, тан тамле ут нэмхуныт ат ващинтасыт.



Ман «Торум Маа» музеюв суссылтапен сака сав махум ёхталасыт, «Музей катпаттат» проектув хосыт маниг варим колыт, ампарыт, нялит ам суссылтасум, ты касын кол урыл ос пормасыт урыл янас потыртасум.

«Волшебный сундучок» тотапсовум ос ёт-тотыгласлум, тот няврамыт магсыл ёнгынутыт, ном-сахтым ёнгасан головоломкат олэгыт. Я-ты, тан тай тот та ёнгасасыт, капыртасыт.

Елизавета Тасьманова, ман музеювт рупитан аги, няврамаквет ос нэквет ет торломтытыл акань

пёрсыт. Ты ханты махум тамле аканит варёгыт, тананыл юнтункве ат эри, нас торломтытыл пёрлыгтанкве рови.

«По дороге на стойбище» нэпакув ос ёттотыгласлув. Ты нэпакт послым уйхулыт манос колыт нупыл телефонын те тактылын, санквылтап суй манос уйхулыт потыртан суй хулэгын, тыи няврамытын ос яныг махмытын сака пумыщ олыс. Тан маттем та ощатахтыгласыт, пумщалахтасыт, насати, тох та рови хунтлункве ос сунсункве.

Пуссын аквъёт ман округувныл сатловтем хотпа Египет ман ялсыт – ты Ханты-Мансийск, Нягань, Сургут, Нижневартовск, Югорск ўсытныл артистыт ос эргынййквнэ махум, тан тот спектаклит суссылтасыт, рущ латныл эргысыт ос ййквсыт.

«Русский Север» проект варыглан магсыл РФ культура Министерство палыл ялнэ магыс олн тастыглавес, ос округ культура департамент тан ты магыс яныг нётмил варсыт.



А.А. Рещиков мот хон няврамыт ханищты

Мот хон нэт акань варсыт

Потыр хансыс

Галина КОНДИНА



Хальўст яныгмам маньлат аги







Юлия Воложанина

лия Воложанина Ханты-Мансийск ўст Югорский университет магистратурат овыл курсыт ханищтахты ос сосса махум Центрыт рўпиты.

Ты элы-палт аги нила тāл «Туризм» щирыл ханищтахтас. 2018 талт тав савсыр университетытт ханищтахтын агит ёт «Мисс студенчества Финно-Угрия» нампа мирхал касылт Марий Эл республикат Йошкар-Ола **VCT** касыс.

Тонт тан танки мираныл ос пёс йис вармаляныл урыл потыртасыт, щань латныл эргыт эргысыт, ййквсыт ос танки мир маснутаныл суссылтасыт. Юлия тот китыт местал майвес ос «Мисс медиа», «Вице-мисс» нампа кит номинацият нох-патыс.

Ань Юлия хумус ханищтахты ос манхурип тэлал пўмщалахты, та урыл маньщи газетав магсыл потыртас.

– Ам Хāльўст самын патсум, тот яныгмасум, школа астласум. Омагуматягум ань Хальўст олэг. Омам Наталья Витальевна Воложанина – маньщи нэ, тав аги опарищ

наме Тынзянова. Атям Александр Викторович Воложанин – саран хум. Ам акв канк оньщегум, тав ос Хальус олы, тот р⊽питы.

Школа юи-пāлт ам Югорский университетколт нила тāл «Туризм» нампа специальность щирыл ханищтахтасум. Овыл курсыт хус арыгкем элумхолас олыс. Тувыл товат похын минасыт, мотаныт ханищтахтункве ат кāсащасыт, нас похын кётвёсыт. Хус хотпанув халт туп 16 аги ос пыгыт диплом-нэпакыл майвёсув.

Ань ам ос магистратурат «история» щирыл элаль ханищтахтэгум. ЮГУ ялантан маньлат хотпат савсыр стипендияолныл ойтавет, ам акв этпос ат сотыра солковил ойтавем. Магистратурат ман ань 13 хотпа ханищтахтэв, 2023 талт диплом-нэпакыл тах мивēв.

*Āнумн ханищтахтуң*кве тыт мусты кос, тувыл тыт акв «проектный деятельность» нампа предмет олы, тот савсыр рўпата урыл хансункве *эри. Ты вармаль хумус* варункве, ам сака ат ваглум, тыимагсыл тыт ханищтахтункве мощ тарвитын.

Югорский университетыт савсыр суссылтапыт, ялпың хōталыт, ханищтапыт ос варыглавет, ам тув акваг ялантэгум. Ань сосса махум центрыт рўпитэгум, тот маньщи, ханты мир культураныл, щань латнаныл элаль тотнэ магсыл савсыр рўпата варёгум.

Ты этпос 20 хоталэт ЮГУ хаништахтан маньлат хотпат мащтырланкве ос **ЮНТУПТЎЩТЫН УТ ЮНТУНКВЕ** вовыгласанўв.

Сосса махум пес йис вармалил ам пумшалахтэгум. Ты урыл савсыр нэпакыт ань ловиньтэгүм. Ам маньщи, ханты махум халтяныгмасум.Омам пёс йис вармалянув урыл ос

Маниг олмум порат тав ётэ янк натнэ порат налми ватан ялантасув, вильтанув витыл ловтсанув ос янкын канпеткат пинсув.

Манрыг тох варункве *эрыс, тонт ат торгамтасум,* тувыл канпёнка пинункве анумн пумащ олыс. Яныгмасум, ань ваглум, сосса махум Най-Отыраныл нупыл тох пойкщегыт ос сав хүл ят вос олы, вовегыт.

Ам маньтагыл омам ёт Уринэква хотал янытлаңкве ялантасум. Хальўст ты ялпын хоталын акваг сав мир акван-атхатыглалы. Тав атың хул йсмит пайтункве ос пилын нянь варункве ёмащакв хасы. Омам тэнут пайтуңкве акваг тув вовыглавес. Ам тав ётэ тув ос ялантасум, тыимагсыл сосса махум ялпың хоталыт сака эруптэгум.

Ман, редакцият рупитан махум, Юлия Воложанинан студентыт янытлан хоталыл янытлылув ос сав ёмас сымың латныл кётылув. Сосса махум пёс йис вармалитыл аквта щирыл элаль вос пумщалахты ос элаль вос тотыянэ. Пус кат, пус лагыл.

Людмила ТЕТКИНА



Сав няврам янмалтам эква

Аньщи хотпа Лидия Анатольевна Мерова тал котиль этпос 22 хоталт 80 талэ товлыс. Тав сав няврам янмалтас, коянэ ин манит олсыт, ойкатэ атимыг емтыс. Эква лавме щирыл, вит-хул ёрыл олсыт, тав те атим олыс, агиянэ-пыганэ ты янытаг хунь яныгмасыт.

Лидия Анатольевна ань мань пыге палт Ханты-Мансийск ўст олы. Намхоталэ кастыл тав ётэ хонтхатыгласум, потрамасмен, олупсатэ овылтыт китыглахтасум, хотыл олы, хот яныгмас. Нан ань элаль эква потре ловиньтэлын.

- Ам 1942 талт Кульпаст самын патсум, тонт яныг хонт олыс. Омагуматягум сас Кульпасныл олсыг. Атям Анатолий Никитин рущ хум, омам маньщи нэ Пелагея Парамоновна, такви опарищ наме Кимлобазова.

Āтям Кульпас лапкат рупитас, тэнут тыналас. Акваг рупитым олыс, армиян ялыс, ёхтыс, элаль ханищтахтас, тувыл лапкан патхатас. Тав маньщи латныл потыртас.

Та порат кос рущ, кос мот мир махум, ман латнув пуссын хулсыт, потыртанкве хассыт. Хонтланвармаль оигпаме юи-палт олупса сака тарвитын олыс, махум сав рупитасыт, хул алыщласыт, вораясыт.

Кульпаст Олька аквум олыс, омам тав оньге, номилум,амляльтумлави: «Нан атян палт лапкан ялэн, нянь вовен». Лапкан минасум, лавегум: «Атя, нянь ат оньщев, нянь маен». Тав лави: «Нас олн ойттал нянил хумус мыглум, нан кон-квалэгын, махум щалтэгыт, сунсэгыт». Нянь ат мис, ам тувыл кон та квалсум.

Хунь атям хотталь

щалтыс, омам Хорыңпавыл хум варыс, тув вантлысмен, ётыл Ваня апщим самын патыс. Ам Хорыңпавылт яныгмасум, агирищиг тот хайтыгтасум.

– Лидия Анатольевна, нан школат хōт ханищ-тахтасын?

- Ōвлэт Хорынпавыл школат, тувыл Лопмуст. Хунь павлувт школа хот-вуйвес, ман пуссын Лопмусн тотвесув, тот ханищтахтасув. Тармыл интернат олыс, тыттувесув.

Тонт сав няврам ханищтахтас. Тэлы ампын суныл тотавев, туи хапыл минэв. Лопмус школа астламум юи-палт элаль ат ханищтахтасум, та пойтсум.

- Хорынпавылт та порат сав хотпа олыс?

- Мир сав олыс, колхоз, школа, лапка, пекарни, пульница олыс. Омам колхозт рупитас, Сорахта нупыл кетавет, тот пум варегыт. Павылт лув, мис сав олыс. Манти мис ос ощсув, щаквит аюнкве эри. Омам ос ягланум вораясыг, хул алыщласыг.

Та порат махум толгегыт, сорых ос нялк тасавит, натылтэгыт. Сорых
хорыг вариянув, луваныл
хот-утыянув. Ань хул
торыныщ ат пувегыт.
Георгий вапсум ворт
яласы, хулыл, нёвлил
кётыглавем.

Ōйкам вораяс, лэнын алыщласыт, сдавайтасыт.



Лидия Анатольевна Володя пыге ёт

Ань тай хотьют эрын алыщлы, ат вивет. Тонт тай пирмайтавесыт, нярлэг ос алыщласыт.

Ман, нэ хотпат, няра, вай юнтыгласув, сахил олсув, ань тай рущ пальтувыл та патсув. Ты супыл Светамн юнтвесум, амти хосат юнтсум, ань самагум акваг витыл сосхатэг.

Саранпавылт Марья ныюм олыс, акв аги оньщиглас. Павыл мир, оманув-атянув, апщим пуссын холасыт. Хорынпавлув ань щар хот-татламас, павыл оссувлавес. Хослохт ос павыл таглэ олыс. Ань нэмхотьют атим, амттем хультсум.

Āпщим Тюменьт олыс, нэ тотыглас. Сав няврам ощсыг, ань ат ханьщиянум. Тан ваганыл, ам тыт олэгум, хуньт эрын ёхтыгпалэгыт.

- Ойкан хотыл олыс?

- Тав Хослох хум олыс, Савелий Прокопьевич Меров. Хорынпавылн ёхтыс, маньнэ суныл, лон-ханьщапын лувыл хайталавёсум, тувыл талт-

тувёсум, Хослохн та тотвёсум.

Та порат сахил масхатэв, тор пинэв. Тав аким ос оныпум ёт ёхталас – нявраманум тан щащекваныл ос опаныл. Ам опаныл кастыслум.

Ойкам ёт Хослохт олсумен, нявраманмен самын патсыт. Тувыл тав атимыг ёмтыс, нявраманум амти янмалтасанум. Хул ёрыл хотмус та яныгмасыт.

Яныг пыгум Валерам ос агиянум Надя, Света, Тася Саранпавылт олэгыт. Коля ос Вова пыгагум тыт Ханты-Мансийск уст олэг. Щар мань агим Верам, пити патта агирищум, Белоярскийт олы. Серёжа ос Саша пыгагум атимыг емтсыг.

– Нявраманын Саранпавыл школат ханищтахтасыт?

– Пуссын Саранпавылт ханищтахтасыт, интернатт олсыт, тот ощвесыт. Маснут, тэнут, хуйнэма, та маныр, пуссын олыс, тот та яныгмасыт. Надям





Лидия Анатольевна āгиянэ, апыгрищанэ ос вāпсэ ёт пōслым ōлы

Светлана āгитэ

яныгнуве, апщиянэ-ййгрищанэ уральтасанэ, нётсанэ.

Хунь ойкам холас, нявраманум ин манит олсыт. Тэлы каникулыт порат юв лаглыл тотыянум ос ампын суныл минэв, ань аквты Саранпавыл лёх хосыт. Кит амп керегум, тан палтаныл та минэгум.

Ётыл тай лувыныг ёмтсўв, лувыл яласасўв. Туи ос Саранпавыл мус нас хапыл, сысы тўпыл товсўв. Тувыл «Ветерок» моторыт квалтапаптувёсыт, моторыл яласанкве патсув.

Мисыл, лувыл олсув, нявраманум яныгмасыт, пум варункве нётвесум. Та щирыл та олсув.

Хослохт ман сартын пес колт олсув, тувыл йильпи кол ўнттысув. Пес колув тай рагматас. Нявранум ань янгыг ёмтсыт, Хослохн ялантэгыт. Ам тан нупланыл лавегум, Най-Отыранын нупыл сунсэн, яныгмам

павлын ёхтэгын, исум щай нох-ўнттыгпалэн, касталэн. Пустагыл вос олэгыт, Торум ёт, Отыр ёт вос олэгыт.

– Āги-пыганын Хōслōх пāвылт яныгмасыт, тāнти лāтӊаныл улпыл вāганыл, потыртэгыт?

– Павланувт элнан мир пуссын маньщи латныл потыртасыт. Ам нявраманум мань тагыл танти латнаныл, рущ латныл потыртанкве ат хассыт.

Интернатт китыглавет, ювле щань латныл потыртасыт, маньщи эрыг эргысыт. Тувыл школат ханьщувласыт, элаль акваг рущ латныл потыртанкве та патсыт.

Хорынпавылт ос Хослохт эрыг-мойт ванэ махум сав олыс. Омам ос эргыт варыглас, эргыс. Пупапщитев ворныл тотаве, та ййквев. Санквылтапыл тай Ёхор ойка тав санквылтас, санквылтапе ёмас олыс. Хоты хотпа пупапщи катын-паттытэ, такви колэн тув ўнттытэ,

мот колн ат рови. Тув мир атхаты, ййквёгыт, тулыглахтэгыт. Ман та ёрыл ты олсув. Ань павлув щар хот-татламас.

Лидия Анатольевна нявраманэ пуссын маньщи латныл потыртэгыт, танти мираныл янытлыяныл, оманылн нётэгыт. Володя пыге Ханты-Мансийск ўст няврамыт ханищты. Николай «Лўима сэрипос» маньщи газетав варнэ колт рўпиты. Светлана агитэ Саранпавыл школат няврамыт щань латнын ханищтыянэ.

Ман, газета варнэ махум, Лидия Анатольевна намхоталэт янытлылув! Сав ёмас, сымын латын тавен лавев. Нявраманэн-апыгрищанэн вос нётумталаве, вос эруптаве!

Ты ятил маньщи хотпав пус кат, пус лагыл, Торум ёт, Отыр ёт вос олы!



Хослох павыл

Светлана РОМБАНДЕЕВА







Хум-акань

Тучаң-сӯнт-хӯрыгсов

Ам амти юнтум пормасанум тыг ёт-тотсанум. 1999 талт павлувт пес клуб-колт семинар олыс. Ам тонт «Элаль» нампа колт рупитасум, Ольга Константиновна Филиппова палт. Ман акван-атхатыгласув, Мария Сергеевна Мерова ос Аксинья Степановна Мерова манав сахин акань юнтункв тот ханищтасаген. Ман овыл щёс тамле акань юнтсув.

Ам ань та пёс акань

нупыл сунсым ты акань

Ёт-тотыглам тучанум пох ёре вуйкан котыл юнтункв номсыслум, тувыл сэмыл котыл ёре та юнтыслум. Ольпе мощ ат тэлыс. Тёлпын сакв, тав маньщи латныл тох лававе, ам ёл-патум саюм хальныл вислум. Тослыслум, тав щар янкыг ёмтыс. Люльнэ халь анквалныл винкв эри, ам ты урыл ат васлум, ётыл потыртавёсум.

Нэмта ёт ос тотыслум. Нэмтан сэтап тув пинаве, туля магаве. Тувыл тыщирыл акван-ёхтылын ос сумкан пинумтылын, сака ёмас. Хот лёнхыт яласанэ порат сака эрнэ пормас.

Тучаң-сўнт-хўрыгсов туи «Мань ўсквет» юнтыслум. Анёквам тучаңсўнт-хўрыгсове хосат омам анумн мистэ, ам тавён ляхтхатасум. Тот яктым утыт, мань сов ломтыт, матарыт оньщавет, нэмхот кинсункв ат эри. Сов пунэ хот-яктыслум, ёмащакв тынтлыслум. Сове сака каминьт, каминьтаг тынтлыслум.

Хум-акань, пунктор ёт-тотсум. Лаввёсум, тор сав. Суп ёт-тотсум, ном-сысум, тыт юнсхатункв патэгум. Щар ат алымегум, ювле та тотыянум.

Наталья Васильевна потыртас, тав пыге Тюмень ўст олы, агитэ ос Саранпавылт олы, ойкатэнтыл няврам оньщег. Нэ пес колыл майвес, тув хотыл мащтырланкв ос юнсхатункв яланты, этипалаг ювле увщитэ колн мины. Тох лавыс, тав колэт пун яктункв ат танхи.

Тамле ёмас мащтыр нэкве Саранпавылт ты блы. Матъёмас тав ўсн ёхталас, учёный махум потраныл хунтлыс. Элаль пустагыл вос блы. Пус кат, пус лагыл.

Валентина ВАСИЛЬЕВА

Юнсхатнэ маньщи нэкве

аранпавылт олнэ нэкве Наталья Васильевна Албина ват саграпнал этпост Ханты-Мансийск ўсн вовыглавес, тонт округувт олнэ ханты ос маньщи мащтыр махум сапранияныл олыс.

Тит хотал сыс тан мащтырлан накыт урыл потыртавесыт, ёт-тотум пормасаныл акв суссылтапн акван-атыглавесыт ос хултвесыт, мак хумус маснутыт юнтуңкв эри ос хумус ат рови.

Наталья Васильевна потыртас, Саранпавылт сат атыт хоталт павылт олнэ мащтырлан маньщи нэквет ос маньлат агит акван-атхатыглэгыт. Ты урыл тав тох лавыс:

- Ман «Кочующая школа» нампа колн ялантэв. Тот Евгения Вьюткина пунктотнэ нэг олы. Анум ты сапранин тетункве тав ты лавыс. Мотаныт прививкал ат варвесыт, тыг ёхтункв ат вёрмысыт. Ам амттем тыг тартвёсум.

Ман тот акван-атхатыглэв, юнсхатэв. Хот щёс порат ёхтэв, онтолов щёс мус тот ўнлахолэв. Тованакт сав мир ёхты, тувыл ос нэмхот ўнтункв, тованакт ос мощща хотпа.

Тув ты нэквет ялантэгыт: Марина Прокопьевна Сайнахова, Нина Митрофановна Качанова, тав эще Евдокия Митрофановна Артеева Люба агитэ ёт, Анна Ларионова Карина агитэ ёт, Татьяна Владимировна Хатанзеева, Лилия Филиппова (Кунова), Светлана Савельевна Мерова, Мария Васильевна ос Елена Фризоргер, Любовь Павловна Стаканова, Валентина Романовна Хозумова. Хотьют матыр йины, та йины. Хотьют матыр юнтункв хасы, та юнты.

юнтыслум. Тасавит тал минас, хот-ёрувлахты. Хунь «Элаль» нампа колт рўпитасум, тонт самагум сака люльсан нанкункв патсыг, ань таимагыс юнсхатункв тарвитын.

Ет-тотыглам пормасанэ

Наталья Васильевна Ханты-Мансийск ўсн такви юнтум пормасанэ ёт-тотыгласанэ. Тан пуссын тот суссылтавёсыт. Ты урыл тав тох лавыс:


– Юнсхатнэ магыс савсыр кот эри. Евгения Вьюткина такви совхозт ёвтыглалы. Сэмыл кот тай сав, вуйкан кот сака мощща.



Н.А. Молданова Н.В. Албина янытлытэ



Луимат рупитанкве танхыс



А.В. Теряева ўщлахтын агирищиг ёт послым олы

Анжелика Владимировна Теряева, марийка нэ, Сургут ўст няврамыт пусмалтан центрыт рупиты. Таве ам рупататэ ос ханищтахтаме урыл титыгласлум, тав тох ты потыратс:

- Ам Марийский АССР Сернурский район Купсола павылт самын патсум. Марисолинский школат аквхуйплов класс мус ханищтахтасум. Элаль ам Н.К. Крупская намыл маим Марийский государственный педагогический институтт мань наврамыт ёт рупитан хотпаг ханищтахтункве патсум.

2002 талт институтум астласлум ос «Преподаватель дошкольной педагогики и психологии» диплом-нэпакыл майвесум. Та тал мен ойкаментыл Ямал ман сав олн сэлункве минасамен. Приуральский район Аксарка павылт тал сыс няврамыт садикт рупитасум. Пыгум самын патыс ос ман ювле, олум мавн, минасув.

Тот олым акваг луима урыл номсысамен, тувыл 2006 талт Сургут усн ёхтысамен, тыт олымен, пыгмен яныгмас, ань элаль ханищтахты. Та порат ам тара центр «На Калинке» нампа савалап няврамыт олнэ колн

няврамыт блнэ колн матыр аквъёт варев.

Няврамыт туи кон ёнгалтавет

рупитанкве патхатсум.

Ты кол сав щёс мот намыл хансыглавес ос ам ань тыг мус тыт рўпитэгум. Няврамыт ётыл хотьют яныгмасыт, хотьют щёмьятын вуйвёсыт. Ты кол ань лававе – «Сургутский реабилитационный центр для инвалидов».

Тыт хурум отделение олы: акв отделеният нёлоловхуйплов талныл яныгнув агмын-мосын, сакватахтам махум пусмалтавет, титыт отделение – агмын-мосын няврамыт оманыл манос атяныл ёт тыг ёхталэгыт.

Тыт ман тананыл ханищтыянув, ёнгалтыянув, лёккарытын пусмалтавет ос хурмит отделениян сав няврамын щёмьят ёхталэгыт, тан нявраманыл ёт ам ты рупитэгум.

Тыг рови хурум сатн ёхталанкве, пульницаныл направление-нэпак винквеостытущлахтункве, пусмалтахтункве.

Ам рўпатам сака эруптылум, няврамыт ёнгалтыянум, савсыр ёнгил тан ётаныл варыглэгум, пластилиныл, нэпакыл савсыр ёнгынутыт ханлэв. Тыттан кастал ат ўнлэгыт, акваг матыр аквъёт варёв.

Това щанит нила-ат нявраманыл ёт тыг ёхтэгыт, савсыр процедуратын тананыл тотыгланкве эри, ман тананылн нётэв, няврамыт хоталь эри – тув хайтталыянув. Ам варнэ рупатам тыщир лававе – специалист по комплексной реабилитации.

– Анжелика Владимировна, нанти оман, атян урыл потыртэн.

– Омам ань павлувт тактёт олы. Мён апщимёнтыл ин маниг олсумён, атямён илттыг хотум ёмтыс, ман хурум манти хультсув. Омамён янмалтавесмён. Апщим ань Москва ўст олы, тот колбаса варнэ мат рупиты.

Ущлахтын порат ман яныгмам мавн юв ёхта-лэв, омамён савсыр атын тэнут вари, марийский нянь тослы, ман лавев – «комака мелна», рущ щирыл – блины.

Тамле нянь сав писыл тославе: овлэт нянь тославе, тувыл та нумпалын пайтым соламат вовтаг сартаве ос сковородка тармыл саритаве, тох сав писыг та вараве. Тамле нянь кур тивырт вараве.

Анжелика Владимировна каркам нэ, тав няврамытын сака эруптаве, тав палтэ молях ханьщувлэгыт. Спортзалн тотыглыянэ, тот хайтыгтэгыт, мечикыл ёнгасэгыт, това порат ййквегыт.

Ам таве щань латне урыл ос титыгласлум, тав лавыс, торгамты ос потыртанкве верми. Ос оматэ хольт тох ёмщакв латне ат вагтэ, тал сыс акв щёс оматэ палт яланты, тыт ойкатэнтыл халэнт мощ потыртэг, савынпалэ рущ латныл.

Галина КОНДИНА

www.khanty-yasang.ru -



Катыл варим пормасыт суссылтавёсыт

инно-угор рўт мирыт халт сав мащтыр махум олы, ман ань Мордва мат олнэ хотпат урыл хансэв. Молты талт финно-угорский мирыт VII съездын акванатхатыгламув порат ты хум хотпат танки варум пормасаныл тот суссылтасыт. Ам тан ётаныл вайхатасум ос рўпатаныл урыл китыгласанум.

Евгений Геннадьевич Миронов

Маньлат хум ййвныл сыресыр пормас ёрги. Тав Подлесная Тавла павылт художественный школат рупиты ос няврамыт савсыр вармалитн ханищтыянэ.

Ты школа 1979 талт Николай Мастинын пусвес. Овлэт няврамыт щаквщин тэлан школан ёхталанэныл порат нас пўмщалавёсыт. Тонт трактористыт ос комбайнёрыт мирытн сака эрсыт. Щаквщин пормасыт нупыл сака ат суссыт. Мокша ос эрзя махум ощнэ пёс наканыл ул вос ёрувлавесыт, Николай Мастин воритотыс ос тувыл ущ ты школаныл «художественный» намыл пинвес.

Няврамытн тот пумыщ ханищтахтункве, тан мокша ос эрзя пёс наканыл янытэт ванэг оньщияныл. Ань ты колт агит-пыгыт ййвныл матыр мащтырлэгыт, ракытныл аны-саныт пощгёгыт ос тананыл хорамыл варункве ханищтахтэгыт.

Мащтырлан колнаканыл матыр-ати эрнэ утыл пуссын ёвтвёсыт, тот нэпак ловиньтан кол, каснэ колнак олы ос музей рупиты.

Мащтыр хотпат тот хосат тагыл рупитанэныл сыс танки хурип ёнгынутыт оньщегыт. Евгений Миронов ты урыл лавыс:

– Ман ййвныл варум пормасанув «тавлинская резьба» намтвёсыт. Мань павылт олнэ элумхолас олупсатэт хумус щакв-

щин тэла олы, ман таи суссылтылув. Ты матум ойка хул алыщлы, тыи пувлынколн мины, та китгыг тэнки халэнт вориотэг. Йивныл ёргим лув хуритэ сав махумн ваве, тав хосытэтыл ман школав ханьщаве.

Ман олнэ мавт мувлахи липа-ййв сав яныгми, ос Тавла я ватат сыстам ракт винкве рови. Матыр пормасыт варнэв порат липа-ййв ляпат олы ос ракт атэв. Пыгрищит янгыщ ёрыгхатункве, агирищит ракытныл аны-сан пощгункве ханищтавет.

– Мāнавн ёргим лув урыл мощ потыртэн. Хумус таве вāрилын?

– Таве липа-ййвныл варилув, лэге мочалал олы. Липа-ййв сулэ лонь-щин витн пинаве, тох этпоскем оньщаве. Тувыл нох-лэватаве ос сулэ ййв халэт тэлнэ писэ лакква

та тарамтахты. Ман таве консупыл консылув.

Липа-ййв ёл-сагрын поратэ бс ванкве эри. Касын тал ты тэла янасыг тара-паттаве, раквын хоталыт манос хоталын хоталыт хунь емтэгыт. Тувыл ёл-сартым ййвыт кит-хурум тал турман мат тослункве эрёгыт.

Касың мащтыр хотпа такви ханьщувлам эрнэ инструментыт оньщи, товат лапкат ёвтыянўв, товат манки вариянўв. Пуссын ты эрнутыт, хаснэ наканув агитн-пыгытн потыртыянўв.

Николай Петрович Родькин

Ты хум ос липа-ййвныл пормасыт вари. Тав Старая Теризморга павылт культура нампа центрыт рупиты. Николай Родькин махумн лапти, пёс лагыл -маснут, варнэтэ магыс



Е.Г. Миронов



Н.П. Родькин









С.Н. Гвоздиков

ваве. Ты коныпал тотапыт саги.

– Ты пēс накытн ам *опамн ханищталвесум.* Ань, ваим, тамле лагыл маснутыл махум ат олэгыт. Нас ялпың хоталыт порат мокша махманув нётнэ маснутыл масхатэгыт, тонт ущ лапти тан масэгыт.

Хотал сыс акваг ке мащтырланкве, кит-хүрүм лапти сагункве рови. Ос патинка манос калоша хурип лапти сагункве ке, мощ савнув щёс мины.

Центрыт ам «лаптеплетение, лыкоплетение» намаим кружокыт няврамыт ханищтыянум. Овлэт тананыл нэпакныл матыр-ати сагункве ханищтыянум, лён-квалгыл сагыт сагёв. Тувыл ущ танки магсыланыл лагыл маснут сагункве лавиянум.

Сав хотпа ман палтув ат яланты, тыи 6-7 классытт ханищтахтын няврамыт. Товат ты пёс накытыл сака пумщалахтэгыт, тан ётаныл анумн рупитанкве ос мусты.

Мот няврамыт ты колувт хорамыл юнтункве, торыт сагункве ос йивныл ёрыгхатункве ханищтавет.

Владимир Петрович

нак такталас, рущ щирыл

Гренадёров Ойка Краснослободск ўсныл съездын ёхталас. Тав анумн торыт сагнэ

Катыл варим пормасыт

«ткачество на дощечках» тох лававе.

Тамле пёс вармальн хум хотпа хаништахтас. Павланылт акв ойка олыс, тавёныл ты тэлат китыглас. Савсыр суссылтапыт сунсыгланэтэ порат тот матыр-ати тара-паттыс. Тувыл такви пластмассаныл эрнэ пант утыт варыс ос сагункве та бвылтах-

Владимир Гренадёров лавыс:

- Мāн «Дубравушка» нампа Эргын-ййквнэ махманув ёт пес порат **ОНЬЩИМ СУПЫТ ЮНТСУВ, ОС** Энтапквалыг нэмхотьют ат оньши. Тонт ам тамле Энтапыт сагункве ты патсум. Ань тыналан магыс сагёгум, това махум сака пўмщалахтэгыт.

Ляпат олнэ павыл няврамыт тамле вармальн ōc ханищтавет. Мāн тай нас эргев, ййквев, таи люль, матумпала махманув мощщамёгыт, ты сака люль. Пёс наканув хотталь акваг ул вос соймегыт, таимагыс няврамыт ханищтэв.

Сергей Николаевич Гвоздиков

Ты хүм сасныл матырати вари. Тав Атяшевский район Сабанчеево павылныл олы. Хум хотпа мащтырлан колт педагогыг рўпиты, тав лавыс:

– Ам Саранск ўст катыл мащтырлан савсыр вармалит ханищтасанум, туп тот сасныл нэматыр ат варсув. Тамле тэлан амки мот хотпатныл пумщалахтасум. Павлумт Замкин мащтыр хум пормасанэ суссанум, това тав варнутанэ ань тыг тотсанум.

Рупатамт янгыщ ййвныл матыр ёргёгум ос няврамыт ханищтыянум. Тот нила группа щирыл лакква-уртхатым агирищит-пыгрищит ханищтахтункве ёхталэгыт.

Амки сымумн ровнэ магыс сасныл матыр пормас варегум. Сыресыр хурит, нялыт, сульят пиннэ хусапыт мащтырлэгум. Ты йист ань сака сав махум пёс накыт хунь ваганыл.

Тан пуссын щепт **ощнэ** телефонт ёнгим ўнлантэгыт, ищхйпын ут хосыт рупитэгыт. Ос хотьютыт ман рупатав пумщаланкве ёхталы, ман сака щагтэв.

> Тамара **MEPOBA**



Маньщи латын элаль тотнэ хотпат

оссия янытыл олнэ 190 савсыр мирытныл 60 латныл потыртан мирыт ловиньтан нэпакыт хансэгыт. Ман, маньщи мирув, такви литература ос оньщи, нэпак хаснэ хотпат ты хосыт щань латнув нотэ элаль тотыяныл. Тувыл ос потраныл хосыт поэтыт сымыт-номтыт ма-вит улылам латнаныл мирн нётнэг лавункве хасыяныл ос вёрмияныл. Тан хансум стиханыл савсыр «Антологият» нампа таратым нэпакт олсыт, ты хотпат Россият вавет, янытлавет.



Татьяна Бахтиярова

МĀНЬ ĀГИ

Хайты агирищ, Мовиньты агирищ, Тахамты агирищ, Тувыл ос нох сыпн хайты.

Сыме войт хуи: Тав апщи оньщи, Тав ягаги оньщи, Тав яныг щемья оньщи!

Щане юн ўнлы, пўрка юнты, Аще щаскемыг ёмтыс – Вораянкве минас, Кўтюве пёстапас, Тувыл ёса вотаяс...

Āгирищ тыхотал сыме войт хуи, Тав āпщитэн, тувыл ягāгитэн Туйткол вāрункв нётаве... Туйт кивырт поварāлы,

мовиньты,

Мовиньт суе юв суйты. Щанькетэ юн ўнлы, мовалалы: Сыме щагты –

суин мань аги оньщи!



Мария Двинянинова

ЙИЛЬПИ ТĀЛ ХŌТАЛ

Пёс талув ты холас, Йильпи тал овылтахтас, Йильпи сот, йильпи щунь, Манавн тав тотас.

> Пўмащипа ман лавев Ювле хультум талтевн, Ты посын хотал мус, Пустагыл ты олсув.

Ань овылтахтан йильпи тал, Ёмщакв янытлытелув, Ёмщакв пумщалытелув, Элыт олнэ посын хотал, Ёмщакв ман вос олылув.

> Тальхың атың ховттёв, Торген ман ты хорамтаслув, Ман туп эрыг овылтэв, Щургункв тав та овылтахты.

Аквтуп тўлыглахтын колн Ман тыхотал ёхтысўв, Паща-нёл хольт масхатым Ховт мувлахи поргысўв.

> Ощмар охсар хурин маснут, Совыр манос апщитев, Ворт олнэ савсыр воруй Ховт мувлахи поргащлэв.

Акван-пухтым ховт мувлахи Ман тыхотал та ёнгев, Аквтох эргим, ощхультым, Элаль ман вос олытев.



Галина Ларионова

ВУЙКАН ТЎЙТ

Тўйт, тўйт, вуйкан тўйт, Хотыл нэглын каминьт тўйт?! Алпыл квалапасум, Кональ аңкватасум.

Матем татем янк, янк. Матем татем посын, посын. Туйт, туйт, вуйкан туйт, Хотыл нэглын каминьт туйт?!

Тэлы ёхтыс, ащирма, Парт хольт ёмтыс янкылма. Яв ос турув янкыл польвес, Иснас сам туйтыл сольвес.

Иснас сāм туйтыл сольвес. Яв ос турув янкыл польвес, Туйт, туйт, вуйкан туйт, Хотыл нэглын каминьт туйт?!

Няврамаквет тўйт пахвтэгыт, Суныл сып урыл тахсэгыт. Ампум тўйтыт поваралы... Лўи вот вови, нямаралы.

Лўи вот вови, нямаралы, Ампум тўйтыт поваралы... Тўйт, тўйт, вуйкан тўйт, Хотыл нэглын каминьт тўйт?!







Саранпавылт пумыщ ёнгил олыс

Хальўс район Саранпавылт краеведческий музей олы. Ты накт тот рўпитан хотпат павылт олнэ махум магыс «Что? Где? Когда?» намаим касыл варыгласыт.

Ань ты касыл урыл манавн Любовь Павловна Стаканова потыртас. Тан тамле ёнгил 2018 талныл щёпиталэгыт ос павылт олнэ махум касункве вовыглэгыт. Тот матахыг лакква-уртхатым хотпат савсыр вармалит урыл китыглавёсыт ос тананыл акв кум сыс номсахтым матыр латын ювле лавункве эрыс.

Ты тал павлың махум ат савит командаг атхатыгласыт ос танки халаныл кассыт. Таланыл щирыл ке, «Проводнички» ос «Исторический клуб» нампа командагт школат ханищтахтын агит-пыгыт олсыт, мощ яныгпалаг олнэ махум «Танцующие люди» ос «Креатив» командагт олсыт.

«Первые» нампа акван-атхатыглам хōтпат савсыр матт рўпитэгыт ос тан ётаныл Руслан Проводников, округ Думан пёриим депутат хум, ёнгыс. Та порат тав Хальўс район янытыл мань павлытт блнэ махум ёт хонтхатыглым яласас ос та сыс Саранпавыл махманэн ёнгилын вовыглавес.

Каснэ махум ань пуссын хурум нак щирыл ёнгалтавёсыт. Кит накыг щирыл тананылн сат китыглахтын латнын матыр ювле потыртанкве эрыс. Тот культура, наука, история ос каснэ вармалит овылтыт китыглавёсыт. Ос хурмит накт Владимир Квашнин, стихыт хаснэ хум, урыл потыртасыт. Тав такви ос тув вовиньталвес, стиханэ ловиньтасанэ.

Тувыл хўрум хотпа жюриг рўпитасыт, тыи Саранпавыл миркол кўщай хум Илья Александрович Сметанин, школат няврамыт ханищтан нэ Раиса Михайловна Капшук ос музейт рўпитан кўщай нэ Вера Павловна Комкова. Командат ўщлахтынэныл халт Лариса Геннадьевна Николаевна ос Нина Николаевна Терентьева эргысыг.

Ань пуссын касылыт астум порат «Креатив» нампа команда мак сав латын ювле лавыс ос тан нох-патсыт. Тот Саранпавыл клубт рупитан хотпат олсыт.

Тāн **Елена Боднар** пунктотнэ нэг пёриялсыт. Тав анумн таи потыртас:

– Тамле касылыт ман касын тал ёнгев, манавн ты вармаль сака мўсты. Манавн акваг пўмыщ, манхурип тэлат овылтыт китыгланкве патавев, тувыл матыр ванэ наканув арталыянўв. Музейт

рупитан хотпат касыланыл мусхалыг щёпитыяныл, сыресыр ощхулит ос варегыт. Ань ман сав ювле лавнэ латын Владимир Квашнин урыл лавсув.

Манавн «сэмыл тотап» ёнгил сака пўмыщ олыс. Тот китыглавесув, элум-холас ўлме хоса хунь ат ёхты, маныр тавен тонт торасты? Ман кофе урыл номылматсув. Ати. Насати, тыи хохса харыгтан хусап. Михаил Булгаков тав хансум потрёт китыглан вармаль олыс.

Мот махманув ёмщакв ёнгысыт кос, тованакт акв кемыл олсув, туп ул мощща сот ощсыт. Ман нох та патсув, командан яныг пумащипа латын лавегум, пуссын юртыныщ акван-нётхатым ёнгысув. Ань ос мот тал кастыл элаль щёпитахтэв тах.

Тамара MEPOBA

12+

Луима сэрипос

(Северная заря) №2 (1260), 27.01.2022 Соучредители Дума, Правительство

Ханты-Мансийского автономного округа – Югры Издатель

Департамент общественных и внешних связей Ханты-Мансийского автономного округа – Югры

Редакция

Директор, гл.редактор - **Динисламова С.С.** Телефон (3467) 33-36-82

Заместитель гл.редактора – **Кондина Г.Р.** Телефон (3467) 33-22-72

Ответственный секретарь – **Узель В.В.** Телефон (3467) 33-23-09

Адрес редакции и издателя: 628011, г.Ханты-Мансийск, ул.Комсомольская, 31 тел./факс (3467) 33-17-52

E-mail:gazeta@khanty-yasang.ru Газета размещена на сайте www.khanty-yasang.ru

Отпечатано:

ООО «Новости Югры-Производство» г. Сургут, ул. Маяковского, д. 14.

Индексы **04399**, **54399** Тираж **1710** экз. Заказ **296**

Цена свободная

Мнение авторов публикаций не обязательно отражает точку зрения редакции.

Газета зарегистрирована Управлением Федеральной службы по надзору в сфере связи, информационных технологий и массовых коммуникаций по Тюменской области, XMAO-Югре и ЯНАО.

Свидетельство о регистрации ПИ №ТУ 72-00795 от 23 января 2013 г.



Щань латын эрыг хольт суйты



Владимир Енов ос Средневасюганский школат ханищтахтын няврамыт учителяныл ёт

анты-Мансийск ўст олнэ мойт ванэ ханты хум, член Союза писателей России Владимир Егорович Енов Томский область Каргасокский район Средний Васюган павылн ялыс.

Средневасюганский школат ханищтахтын няврамытн ос учителитн Владимир Егорович сака ўрвес. Тав 20 тал ювле хультум порат та мат Новый Тевриз павылт олыс, школат рущ латын ос литература урок ханищтым рўпитас.

Тот савсыр мир няврамыт ханищтах тасыт: хантыт, рущит, украинцыт, поволжский немцыт, турокт-месхетинцыт, хатанит.

Владимир Егорович лавыс, тав варум тэлатэ тот олнэ мирн номаве, ханищтам хотпанэ тавён сав ёмас латын, пумащипа латын лавсыт. Пуссын элаль ханищтахтасыт, олнэ мананыл магыс сав эрнэ тэла варёгыт.

Школа рўпитаме порат Владимир Егорович такви ос акваг ханищтахтас, рущ латын мўсхал щирыл ханищтастэ, хумус торыныщ потыртанкве ос потрыт хансункве эри. Тыи тавён сака нётыс, тувыл нэпак хаснэ хумыг ёмтыс, ханты ос рущ латныл потрыт ос мойтыт хансункве патыс.

Писателиг ёмтме юипалт, рўпитам школатэн ёхтыс. Овлэт овыл классытт ханищтахтын няврамыт ос учителит ёт потрамас, тувыл яныгнув няврамыт ёт хонтыглахтас. Ханты мир мойтыт ос потрыт ловиньтас, овлэт щань латныл, тувыл рущ латныл.

Школат рўпитан нэт ос хум хотпат лавсыт, Васюган мат ханты латын тан хосат ат хулыгласыт, щань латныл тот ань нэмхотьютаныл ат потырты. Татем нётнэ латынакве олнэтэ, щар эрыг хольт суйты.

Ханищтахтын агирищитн ос пыгрищитн Владимир Егорович маттем та китыглавес, нэпакыт хансункве хунь овылтахтас, щань латныл потрыт хансункве тарвитын ман ати. Няврамыт таве суйтал ўнлым хунт-

Мойт ванэ хум тох лавыс:

– Касың рўпата ёмащакв варункве эри. Элумхолас номсахтым олы те, тэланэ каркамыщ щёпитыянэ, тонт ущ мирн касалавет, пўмщалавет. Тованакт атхунь тарвитың, ос воссыг хоталь вархатункве, овылтан тэлат астланкве эрегыт.

Акв хōтал Владимир Егорович Дом культуры колн ялыс, тот яныгхотпат ёт хонтхатыглас. Такви мире, пёс махманэ овылтыт потрамас, лавыс, щань латне таимагыс ёмащакв вагтэ, ханты мойтыт ос пёс йис потрыт маньтагыл хулыглас, опаге-щащекваге ос павыл махум потырталсыт, мойтыглалсыт.

Хулыглам потрыт тав пуссын нэпакын хассанэ, рущ латныг толмащласанэ. Ань тамле хонтхатыглапыт олыглан порат, янге-мане нупыл ханты ос рущ латныл потыртыянэ.

Средний Васюган павылт олнэ махум китыглахтын латын сав ощсыт, лавсыт, тот ань ханты латныл нэмхотьют ат потырты, таимагыс тан щагтым ты хунтлысыт.

Владимир Егорович сымыныщ потыртас, стихыт ловиньтас, лавыс, сав тал ювле хультум порат Васюган мат ат те рупитас, эрын нэпак хаснэ хотпаг ат емтнув, хунь ваве.

Тот рупитаме порат тав яныгмам матэ ос таквимахманэ урыл акваг номсыс, сав щёс касэ холыглас. Тувыл мойтыт ос пес потрыт ёл-хансункве патыс.

Ётыл, хунь Ханты-Мансийск ўсн олмыгтас, нэпакыт таратанкве номылматас. «Обские сказы», «Подарокменква», «Сказы рода Правдивых людей» ос мот нэпакыт таратас.

> Потыр Вениамин Енов хансыс, маньщи латныг Светлана РОМБАНДЕЕВА толмащластэ